

11 AUGUST

RUGACIUNEA 1

SF.CUVIOS

TEODOSIE 2 DE LA PECERSKA

Молитва первая

Воинствование земное на духовную брань преложивый и о людех своих доброе попечение показавый, блаженне Феодоре преподобне! К тебе в смятении сердец наших прибегаем и твоя помощи стране нашей и душам нашим смиренно просити дерзаем. Вемы, угодниче Божий, яко малодушие наше и леность духовная далече от твоя пажити ны отрывает и всякаго омерзения достойны ны соделовает: но милосердие твое ко врагом и предателем своим поминающе, имже паки защитник явился еси, равнаго милосердия твоего и нам недостойным молим. Ты убо угодниче Христов, от агарян разоренную землю нашу и от иноверных подавляему, жалостию и любовью объемля, паки к бодренному житию верныя призвал еси, елико воинскими победами, толико и молитвою и образом жития своего аки свещник златый блистаяся, ты мирскаго жития суету оставль сам

убо о души своей попечению в пещернем уединении предался еси, земли же наша попечение и исцеление славному роду твоему заповедал еси, и тако предел свой еще на двести лет и вящше по кончине твоей от сетей еретических оградил еси. Ты и далече суще единокровное нам племя чешское ко православней вере приближати тщался еси и от латинскаго нашествия ограждал еси. Ты и ныне на небесех душею со ангелы водворяяся, нетленным же телом посреде нас почиваяй, наших не отрини гласы скорбныя, но молитвенный плач согрешающих сынов земли наша услыши. Согрешихом бо неправдовахом и от завет Божиих отступихом, в развращенныя обычай зле впадохом и еже едино на потребу есть, душ наших спасение в небрежении оставихом, тебе в Бозе правда и слава отче преподобне, нам же стыдение лица. Оба елико грешнейшии явихомся толико вящшаго сострадания твоего требуем и в покаянии зовем ти сице: твоя неистоцимая любве луч нам ниспосли, гнев Божий, праведно на ны движимый, молитвою твоею от нас отведи, спасительную благодать Его к нам недостойным предстательством твоим низведи и от греховных бездн к высоте покаяния нас возведи, да тако и мы житие свое исправить потщимся, крепость земли наша паки обновляти начнем, врагов же

веры Христовы и злых прелестников
безбоязненно отражати словом и житием
возревнуем и Спасителя нашего со всеми
святыми благодарно воспевати будем, славяще
Его со Отцем и Святым Духом, во веки веков.
Аминь.